

Izjava OHR-a na konferenciji za medije međunarodnih organizacija

Pregled finansijskog poslovanja SDS-a

Donijeli smo sa sobom kopije pregleda finansijskog poslovanja Srpske demokratske stranke koji je izvršio specijalni revizor. Neke od informacija koje je otkrio revizor su proslijeđene u Ured javnog tužioca i zato ne mogu biti objavljene, ali materijal koji se *može* danas objaviti predstavlja katalog zloupotreba, korupcije i izbjegavanja poreza u SDS-u. Izvještaj je otkrio

- sistematske računovodstvene nedostatke
- nedovoljno izvještavanje o izdacima, sredstvima i donacijama
- nepotpune članske liste (koje su u sukobu sa Statutom same stranke)
- SDS-ovo neplaćanje socijalnih doprinosa i poreza za uposlene članove osoblja
- da je SDS koristio općinsku imovinu besplatno
- neplaćene račune odnosno dugovanja SDS-a prema javnim preduzećima

Dajući svoj komentar na izvještaj, visoki predstavnik je rekao: "Na osnovu ovog izvještaja je jasno da nemožemo biti sigurni da stranka više ne obezbjeđuje finansijska sredstva svom optuženom osnivaču Radovanu Karadžiću. Veze stranke sa kriminalnim radnjama i ratnim zločincima se moraju jednom zauvijek prekinuti, a novo vođstvo mora započeti sa zadatkom da raščisti stranku koja je prožeta korupcijom i koja je zauzvrat korumpirala institucije Republike Srpske. Nakon odluka koje sam donio juče, oni sada imaju priliku da to urade. Nadam se da će iskoristiti ovu priliku."

Izvještaju se može pristupiti elektronskim putem na web stranici OSCE-a.

Komisija za restrukturiranje policije

Visoki predstavnik, premijer Adnan Terzić, novi predsjedavajući Komisije za restrukturiranje policije i policijski komesar EUPM Carty će sutra održati konferenciju za štampu u zgradi zajedničkih institucija BiH i predstaviti Komisiju za restrukturiranje policije kao što je to juče najavio visoki predstavnik.

Važna poboljšanja u sposobnosti policije su omogućena uz podršku prvo IPTF-a, a sada EUPM-a, međutim jasno je da sama struktura policije u BiH sprječava da se poduzme efikasna akcija protiv glavnih šefova i mreže organizovanog kriminala koji djeluju unutar i širom BiH na štetu običnih bh. građana. Kao što znate, komunique sa samita NATO-a u Istanbulu i Studija izvodljivosti Evropske komisije posebno navode ovu oblast i traže od BiH da ojača svoje policijske strukture da bi se pridružila Partnerstvu za mir i napredovala ka evropskim integracijama.

Visoki predstavnik će sutra izložiti mandat Komisije za restrukturiranje policije u kojem se, kao što je rekao juče, "ništa ne podrazumijeva i ništa nije isključeno, a prioritet će biti da se osigura da građani ove zemlje koji se pridržavaju zakona dobiju policiju koja će biti strukturirana tako da služi njihovim interesima, a ne interesima korumpirane nekolicine."

Izdat ćemo obavještenje za javnost sa detaljima sa ove konferencije za štampu u toku dana.